

11 JUL 2003

Multaqa-Transformasi/I

ISLAM DI MALAYSIA BERKEMBANG DI BAWAH PEMERINTAHAN DR MAHATHIR

PUTRAJAYA, 11 Julai (Bernama) -- Transformasi paling besar dan signifikan telah pun berlaku di Malaysia di bawah kepimpinan Datuk Seri Dr Mahathir Mohamad, kata Profesor pelawat dari Universiti Georgetown, Washington.

Prof Dr Osman Bakar yang menduduki Kursi Islam di Asia Tenggara di universiti itu berkata Perdana Menteri telah menukar minda dan sikap orang Melayu menerusi dasar "Islamisasi" yang selari dengan tuntutan Islam dan dunia moden.

"Semasa pemerintahan beliau, banyak institusi kewangan dan komersial Islam, rancangan serta projek lain diwujudkan bagi memudahkan umat Islam menyertai projek ekonomi moden," katanya ketika membentangkan kertas kerja bertajuk "Islam dan Permodenan: Pengalaman Malaysia" pada hari kedua Multaqa Ulama Sedunia di sini hari ini.

Bekas pensyarah di Universiti Malaya itu berkata matlamat politik Dr Mahathir adalah untuk menjadikan Islam di Malaysia sinonim dengan kemajuan ekonomi dan permodenan.

Bagi Dr Mahathir, katanya hanya menerusi Islam, orang Melayu boleh bangun dengan jayanya dalam menyahut cabaran kemajuan ekonomi dan permodenan.

Dr Osman berkata Malaysia juga menekankan pembangunan berasaskan agama yang termasuk penubuhan institusi agama, memodenkan sistem zakat dan haji.

Beliau berkata rangkaian masjid dan surau yang dibina di Malaysia adalah yang terbaik dalam dunia Islam.

"Pembinaan masjid menjadi antara pembangunan penting dalam rancangan pembangunan lima tahun Malaysia sejak Merdeka lagi. Kemudahan untuk menunaikan solat di Malaysia adalah yang paling moden," katanya.

Dr Osman juga berkata Kerajaan Malaysia dan pertubuhan bukan kerajaan terbabit dalam "mengislamisasikan" pengetahuan sejak dua dekad lepas.

Seorang lagi pembentang kertas kerja, Prof Dr Mohamed Din Syamsuddin dari Universiti Islam Jakarta Indonesia, berkata matlamat pembentukan negara Islam adalah holistik, untuk memenuhi tuntutan material dan rohaniah.

Ini berbanding dengan perspektif Barat yang bermatlamatkan mencapai kekayaan material semata-mata, katanya dalam kertas kerja bertajuk "Al-Quran dan Sunnah dalam pembangunan negara Islam moden: Menterjemahkan inspirasi syurga kepada aplikasi di atas Bumi".

"Pada perspektif falsafah politik Islam, matlamat penubuhan negara Islam adalah untuk merealisasikan kebahagiaan di dunia dan akhirat," katanya.

Beliau juga berkata dalam Islam, pembentukan negara Islam bermaksud melahirkan ummah terbaik.

-- BERNAMA
MAM MAM LAT